

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 099470 23 K
Visoko, 08.02.2024. godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog A.Z.sina Đ. iz V., zbog krivičnog djela Nasilje u porodici iz člana 222. stav 4. u vezi sa stavom 2. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KTD 0055333 23 od 11.10.2023.godine, nakon zaključenog glavnog javnog pretresa, održanog dana 07.02.2024.godine u prisustvu Kantonalnog tužitelja Mustafić Mesuda, i optuženog A.Z., branioca optuženog Lemeš Tarika iz Visokog, na pretresu za objavljivanje presude, u prisustvu kantonalnog tužitelja i optuženih i branioca, dana 08.02.2024. godine, donio je i javno objavio :

PRESUDU

OPTUŽENI: **A.Z.**, sin Đ. i majke F., rođene S., rođen ... godine u V., gdje je i nastanjen u ulici R.K. broj ..., pismen, sa završenih osam razreda osnovne škole, NK radnik, živi u vanbračnoj zajednici, otac troje djece, nezaposlen, po narodnosti Rom, državljanin BiH, JMB ..., L.K.broj ... MUP ZDK Visoko, osuđivan presudom Općinskog suda Visokom broj 41 0 K 094423 22 K od 06.03.2023. godine, za krivično djelo posjedovanje i omogućavanje uživanja opojnih droga iz člana 239. stav 3. KZ F BiH na kaznu zatvora u trajanju od 2 (dva) mjeseca, uslov 1 (jedna) godina, pravosnažna dana 12.04.2023. godine,

KRIV JE

što je,

dana 03.10.2023. godine oko 15,00 sati, u Visokom, u ulici V.b. broj ..., nasiljem, drskim i bezobzirnim ponašanjem ugrozio mir, tjelesnu cjelovitost i psihičko zdravlje članova svoje porodice sa kojima živi u zajedničkom kućanstvu i to svoje vanbračne supruge S.S. i djece, mlđb.1. i mlđb.2. na način da se S. koja je bila u dnevnom boravku sa kćerkama, obratio riječima: „Šta je sad, dosadili ste mi i ti i djeca, pustite me malo, hoću da se odmorim od vas, nisam se naspavao“, pa nakon što mu je S. rekla da bi bilo lijepo da bude u kući, kada im dođu prijatelji, istoj psovao Boga, obraćajući joj se povišenim tonom: „Jebem ti djecu“, nakon čega je gađao nesecerom u kojem su se nalazile kreme, dok je S. sjedila na sečiji i dojila mlđb.1., a potom kada je S. spustila dijete pored sebe na sečiju prišao S. i počeo da je udara rukom u glavu, od kojih se udaraca branila tako što je lice pokrila svojim rukama, zbog čega je S. ustala i pobjegla od istog u drugu sobu, te zaključala vrata kako ne bi mogao ući, nakon čega je nastavio da joj psuje Boga, mater i djecu, te udarao u vrata koja je ošteti u predjelu šteke, pa kako nije mogao ući udaljio se sa lica mjesta, a oštećena pozvala policiju i tražila pomoć, svjestan da će takvim nasiljem ugroziti mir, psihičko zdravlje i tjelesnu cjelovitost oštećenih, što je i htio,

dakle, nasiljem drskim i bezobzirnim ponašanjem, ugrozio mir, tjelesnu cjelovitost i psihičko zdravlje članova svoje porodice s kojima živi u zajedničkom kućanstvu od kojih su dvoje mladb.-djeca,

čime je počinio krivično djelo Nasilje u porodici iz člana 222. stav 4. u vezi sa stavom 2. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 1(jedne)godine, a koja se neće izvršiti ako optuženi za vrijeme od 2(dvije)godine ne počini novo krivično djelo.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KD 0055333 23 od 11.10.2023.godine , optužilo je A.Z., zbog krivičnog djela Nasilje u porodici iz člana 222. stav 4. u vezi sa stavom 2. KZ F BiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana : 16.10.2023.godine. Dana 12.12.2023. godine na ročištu o izjašnjenju o krivnji, optuženi A.Z. se izjasnio da nije krivi za krivično djelo koje mu se stavlja na teret.

Na glavnom pretresu održanom 07.02.2024.g. nakon što je sud saslušao oštećenu S.S., optuženi A.Z. se obratio sudu i priznao krivnju za krivično djelo Nasilje u porodici iz člana 222. stav 4. u vezi sa stavom 2. KZ F BiH, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: zapisnik o lišenju slobode PS Visoko broj: 08-02-09/1-182/23 od 03.10.2023. godine,- zapisnik o uviđaju PS Visoko broj: 08-02-09/1-243/23 od 03.10.2023. godine,- specijalistički nalaz JU Dom zdravlja Visoko od 03.10.2023. godine na ime S.S.,- rješenje Općinskog suda u Visokom broj: 41 0 Pr 099350 23 Zm od 04.10.2023. godine, -izvod iz kaznene evidencije za osumnjičenog A.Z.PS Visoko broj: 08-02-09/1-interno/23 od 04.10.2023. godine.

Optuženi je izjavio da je saglasan sa izjavom oštećene da se događaj desio kako je to svjedok opisao, da je bila bezvezna rasprava i da je odmah poslje toga život nastavio normalno teći, ako je to krivično djelo kako je to opisano onda ja to priznajem. Moli sud da uzme u obzir, iskaz svjedoka u dijelu kojem je rekao, da je život nastavljen normalno i da bi kazna bila kazna za nju i djecu, a ne za mene.

Branitelj u završnoj riječi izjavio da optuženi moli sud da ga kazni blažom sankcijom, cijeneći prije svega izjavu oštećene koja je izjavila da su se nakon ove svađe porodični odnosi promijenili tj. da su isti sada normalni i da je ovaj događaj predstavljalo običnu bračnu svađu, koja je ustvari svakodnevnica u svakoj porodici. Eventualnom strožijom kaznom, a što je potvrdila i sama oštećena kaznili bi se ona i njena djeca, jer je optuženi jedini hranitelj troje djece, nezaposlen je, porodicu izdržava od privremenih poslova, a krivično djelo za koje je

osuđen ranijom presudom nije isto ili istovrsno krivično djelo sa ovim djelom. Imajući u vidu sve navedeno, priznanje optuženog i iskreno kajanje njegovo molim sud da ga što blaže kazni.

Sud je ovo priznanje krivnje optuženih ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnog djela Nasilje u porodici iz člana 222. stav 4. u vezi sa stavom 2. KZ F BiH.

Po ocjeni suda optuženi je navedeno predmetno krivično djelo učinio sa direktnim umišljajem jer je bio svjestan svog djela i htio njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predočenim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela Nasilje u porodici iz člana 222. stav 4. u vezi sa stavom 2. KZ F BiH.

Prilikom izricanja krivično pravne sankcije sud je cijenio optuženom A.Z. kao olakšavajuću okolnost cijenio činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i okolnost koje je optuženi naveo u svom iskazu prilikom priznanja krivnje, kao i iskaz oštećene, te činjenicu da optuženi do sada ranije osuđivani, ali ne za istovrsno krivično djelo. Dok je od otežavajućih okolnosti sud uzeo u obzir samu prirodu i vrstu krivičnog djela koje mu se stavljaju na teret. Cijeneći utvrđene okolnosti na strani optuženog, sud je optuženom A.Z., za navedeno krivično djelo utvrdio kaznu zatvora u trajanju od 1(jedne)godine, koja kazna se neće izvršiti ako optuženi u roku od 2(dvije)godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenih krivičnih djela koja mu se stavljaju na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

Sudija
Avdija Avdić

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.